

Powšitkowne WOZJEWJENJA

njedźelu, 28. februara 2016

„Njezranliwe? Žiwjenje ze zbrašenjom“

Na třećim wječoru w rjedže lětušich póstnych seminarow w Smochčanskim Domje biskopa Bena póndźelu, 29. februara, porěči profesor dr. Ulf Liedtke z Lipska k temje „Njezranliwe? Žiwjenje ze zbrašenjom“. Započatk je w 19.30 hodź. Mjez sobuzarjadowarjami je Towarstwo Cyrila a Metoda z.t.

Zetkanje Serbow w sakskej stolicy

Serbja w Drježdžanach, jich přiwuzni a přećeljo su wutrobnje přeprošeni na Božu mšu w serbskej rěči z fararjom Gabrišom Nawku. Tutu budžemy njedźelu, 6. měrca, w 16 hodź. w cyrkwi swjateho Antonija, w Drježdžanach-Löbtauwe, Bünauska 10, swječić. Po kemšach zetkamy so k serbskej bjesadze we wosadneje rumnosći. *M. Bubnerjec*

Wječork wo žarowanju

Na rozmołwny wječork k temje žarowanje přeprošuje Hornjołužiski zwjazk Charity. Tutón wotměje so póndźelu, 29. februara, we 18 hodź. w ewangelskej wosadnicy (zachod wot Angera). Zastupjerjej ambulatneje hospicneje služby Charity podatej zawod do sensibelneje temy.

Bratrowstwo hraje w Sulšecach

Přichodne předstajenje dźiwadłoweje hry „Hdyž kokula woła“ budže tutu njedźelu, 28. februara, w 16.30 hodź. na žurli w Sulšecach. Dźiwadłowa skupina Bratrowstwa wšitkich wutrobnje přeprošuje.

Duchowny koncert młodeho serbskeho komponista z hudźbnej nowostku

Prapremjera twórby „Stabat mater“ młodeho serbskeho komponista a cyrkwinskeho hudźbnika Feliksa Brojera zaklinči sobotu, 12. měrca, we 18 hodź. w klósterskej cyrkwi w Pančicach-Kukowje. Drje přeni króć w hudźbných stawiznach bu šěroko znaty tekst za basowe solo a smyčkarjow skomponowany. Twórbu zanjese ansambl Chordophone z Budyšina a młody spěwar a student cyrkwinskeje hudźbny Tom Kessler z Hamburga. Zastup je darmotny. Prosy so wo kolektu. Dalše předstajenje budže wulki pjatk, 25. měrca, w 19.30 hodź. w Smochčanskim Domje biskopa Bena.

Putniska jězba do Swjateho kraja

Wot póndźele do póndźele, 4. do 11. apryla 2016, organizuju putnisku jězbu z lětađłom do Swjateho kraja. We wobłuku kołojezby z busom smy tam mjez druhim w Galileji po puću a wopytamy města Jerusalem, Betlehem a Jericho. Přizjewić měli so zajimcy hač do wutory, 15. měrca. Nadrobniše informacije dóstanu pod telefonowymaj čisłomaj (01 63) 7 33 82 05 abo (03 57 96) 9 54 28 (hakle po 19 hodź.) abo pola mje w Hórkach, Sydlišćowu puć 2. *Maćij Hadank*

Komplet a tójšto wjace

Přeprašujemoj wšitkich młodostnych wutrobnje na zarjadowanja dekanatneje młodžiny w póstnym času, kotrež maja dušinemu natankowanju a rozmyslowanju služić:

sobotu, 5. měrca, w 20 hodž. – komplet (mision) w Kulowje

sobotu, 12. měrca, w 20 hodž. – komplet w Njebjelčicach

pjatk, 18. měrca, w 20 hodž. – nóc wujednanja w Róžeńće

njedželu, 20. měrca, w 14 hodž. – křižowy puć w Pančicach-Kukowje

Po kompletach je stajnje něšto spřihotowane. Dajće so překwapić! Póstny čas njech služi tež jako přihot na Swětowe zetkanje młodžiny.

Leńka a Lucija, młodžinskej referentce

Putniska jězba do Španiskeje a Portugalskeje

Wšitcy zajimcy su wutrobnje na putnisku jězbu z busom do Španiskeje a Portugalskeje přeprašeni, kotraž budže wot soboty do njedžele, 9. do 17. julija. Wopytaja Barcelonu z katedralu Sagrada Familia, španisku stolicu Madrid, Avilu a Albu – městnje skutkowanja swjateje Terezy z Avile – a znatej putniskej městnje Fatimu a Santiago de Compostela. Přizjewjenja su móžne pola Šmitec w Radworju, telefonowe čisło (03 59 35) 28 60 abo z mailku na adresu: email@schmidt-reisen-radibor.de.